

明雜史十六種
(六)

中華書局 編

中華書局

中華書局 編

明雜史十六種
(六)



中華書局

第六冊目錄

北虜事蹟一卷	西番事蹟一卷		一
北虜事蹟			三
西番事蹟			七一
跋			一三二
平粵錄(存二卷)			一三三
定陵注略十卷(卷之一——二卷補)			三九九
定陵注略小叙		文秉	四〇一
定陵注略目錄			四〇五
卷之一			四〇九
卷之二			四八七
二卷補			五五九

〔明〕王 瓊 撰

北虜事蹟一卷 西番事蹟一卷



北虜事蹟

王恭襄公璣

國初於夏州立寧夏府洪武五年廢之徙其民
於陝西九年後復設寧夏等五衛於上郡設綏德
衛北地設慶陽衛於河西張掖設甘州等五
衛酒泉設肅州衛湟中設西寧衛又設鎮番莊
浪衛又於金城設蘭州衛皆置將帥屯兵拒守
成化九年於綏德衛東北二百七十里地名榆

塞設榆林衛總兵等官移鎮于此

元萬戶把丹據平涼洪武初歸附授平涼衛正
千戶部落散處開城等縣編為民仍號土達其
壯者選為平涼衛軍○正統十二年北虜住牧
河西地名扒沙寇莊浪巡撫陝西右侍郎羅汝
敬督運糧餉經過莊浪遇賊被傷平虜將軍都
督蔣貴統領京營精銳官軍巡哨剿殺失利○
正統十四年北虜阿渠寇陝西平涼土達被掠
○天順四年北虜孛來毛里孩將萬騎寇固原

回至黃河大壩對岸下營欲渡河掘大壩渠水灌
寧夏城時寧夏精騎調援延綏鎮守都督張泰
募義勇三千餘人付其子翊管領至壩與虜背河
而營夜半賊渡河敗之翌日使善浮水者浮水罵
之虜以為水淺悉衆渡河翊令車徒截其半前
驅者盡溺水中斬獲數百追出賀蘭山外而還
○成化二年北虜大舉入寇固原土達李俊迎
獻羊酒有北從意○四年平涼衛土達滿四反
據石城都御史項忠討平之○五年添設西安

千戶所陞固原千戶所為衛及設兵備僉事○十年巡撫寧夏都御史徐廷章鎮守都督范瑾奏築河東邊牆自黃沙嘴起至花馬池止長三百八十七里

成化七年套虜侵邊總制都御史王越駐常州調軍防禦事寧革罷

弘治十三年虜首火篩大舉寇大同官軍禦之敗績是年冬踏冰過黃河套住牧○十四年總兵官保國公朱永監督軍務太監苗達提督軍務右都

御史史琳帥京營官軍詣榆林調集各路軍馬號稱十萬分布常州等處禦之工部侍郎李鑑總督軍餉它運八府之粟隨軍供給虜衆數萬由花馬池折牆深入固原安會等處大掠而出官軍戰死者甚多

弘治十五年兵部議奏於固原設總制推用戶部尚書秦紘兼左副都御史任之適虜賊不住套取回本部管事○十八年十二月十七日虜賊五萬餘騎到於花馬池北柳楊墩西它開牆口二十處

及將靈州東北清水營堡攻陷深入固原平涼安會等處大掠而出

正德元年總制陝西邊務左副都御史楊一清建議大發丁夫寧夏并西安等二十四衛所四萬名西安等七府五萬名共九萬人幫築先年都御史徐廷章等所脩舊牆高厚各二丈牆上脩蓋煖鋪九百間用軍四千五百人守之挑濬舊塹亦深闊各二丈期以四月工完二年夏四月興工起自橫城自西而東築牆三十里人衆聚集汲爨艱難又

皆露宿風雨無所避多生疾病至有死者人心怨
懟遂折竿懸旗呼譟欲潰散管工官令騎兵圍而
射之乃止一清知衆情難久下令築花馬池城完
即放散五日而城完乃散歸

一清知設險拒守為上策矣而不知九萬丁夫
不可並役于一時責成于四月之內也亦不知
設險而無以守之則險亦不足恃也長江天塹
為險大矣隋滅陳元滅宋渡江如履平地雖有
險不能守耳嘗觀都御史徐廷章等所築邊牆

非但低薄易毀每五七里置一墩數人守之花
馬池城聚兵不及二千直去墩牆二十里橫斜
至牆輒四五十里賊少入追之不及大舉閉門
不敢出常被圍困使一清築牆工成敗大舉毀
牆豈鋪軍所能禦而花馬池軍千餘豈敢馳出
數十里之外乏水草之地與強虜鬪哉是知牆
雖成亦難守耳今議於各營堡有城去處相連
挑挖溝塹深闊各一丈內為隄壘連溝高三丈
比之築牆工省而難毀賊至各營堡出兵沿溝

壘擺列用火器鎗砲擊之所謂一夫當關萬人莫敵者有險而能守之道也易曰王公設險以守其國險而無以守之聖人之所不能也

正德四年套虜侵邊總制工部尚書才寬調兵自花馬池西北一百里興武營地方出口禦之斬首數十級班師虜伏兵追射之斃于馬上廕子世襲錦衣衛百戶○是年北虜小王子怒頭目阿尔禿廝丞相亦卜剌欲殺之二酋懼奔出河套擁部落萬餘至涼州城下乞空閑地安住分守涼州將官

閉門不敢應凡十餘日始大掠莊堡入西海攻破
西寧安定王等族奪其誥印諸番散亡據其地而
居之○九年吏部尚書楊一清主議薦都御史彭
澤調榆林寧夏精兵逐剿北虜住西海者澤令總
兵官徐謙帥萬人征之虜聞南渡河大掠洮岷易
馬屬番奔四川松潘地方未久復回西海住牧後
阿尔禿厮亦卜剌二枝俱歸順小王子北徙未幾
亦卜剌一枝聞小王子復有殺害意仍遁入西海
住牧

正德十一年五月二十二日套虜二萬餘騎到於花馬池北鎮邊墩起至石井兒墩止折開牆口一十二處深入固原等處搶掠而出。○本年七月二十二日套虜二萬餘騎到於花馬池北柳楊墩起至青羊井墩止折開牆口一十六處深入平涼臨鞏直抵隴州大掠而出總制右都御史鄧璋調榆林等處官軍分布固原要衝不能禦。○八月套虜一枝自榆林直下來脂綏德無定河大川至山西石州黃河西岸大掠而歸榆林官軍亦不能禦。

正德十三年套虜萬餘由花馬池北拆牆入靖虜
安定會寧地方大掠而出

正德十六年十二月二十三日套虜七八千騎到
於花馬池西北圓山兒墩拆牆口二處入境搶掠
而出

嘉靖元年正月十五日套虜一千三百餘騎到於
圓山兒墩拆開牆口二處入境搶掠○三月二十
三日四五千騎於圓山兒墩東西拆開牆口五處
入境搶掠○六月二萬餘騎到於石井兒等墩拆